



Taoba Pakistan PM Nawaz
Sharif mapa tasen nguogo



Taoba mapang MLA aser BJP lenir
Faqeer Mohd Khan sür lia angu

Azüsalar metsübaazüoktsü mera agiang: AKMWC

Kohima, Metsüremi/March 20 (TYO): Colony aika nung azü chioker/salar metsüba aser ibaji ajanga Kohima municipality kübok nübur nem lendong agütsüba nungi jenbutsü asoshi mera agia aru, saka District Administration aser KMC ajanga item mera songtemtsü, ta Association of Kohima Municipal Wards Council (AKMWC) ajanga Deputy Commissioner, Kohima dangi züluba shiti ka nung shia liasü.

Aser March 15, 2025 nü chioker/salar metsüba azü kati Lower PWD Colony, Kohima nung alir arishi küm 3 tanur ka dak kanga sashia angu aser teti asoshi tarak ketja pa takum kumzüksü asoshi raraba mapang lir.

Anungji apuba azü tem ayutsü

asoshi Dog Kernels kwi amenoka lir, chioker/salar metsüba azü aputsü asoshi nisung kwi yua lir aser Kohima jila nung nüburtem takum kumzüksü asoshi kechi mera sa agia lir, itemji metetner, ta AKMWC-i (taoba mapang AKMWP ta ajaba) metetner, ta DC Kohima dang ashi.

Administration lisem nung tekolak remer tebilemtsü samadaksünüa melitetsü. Tai maket lendong ajurur alir nem tekeratiba nung senotsü teyari agütsütsü akhanger, ta ashi.

Kohima nung aliba nüburtem kumzüka ayutsü mechi azü salar metsüba azüoktsü asoshi tim ketdangsüri tekeratiba nung tapet mera agitsü kanga ajungshir, ta AKMWC ajanga DC Kohima dangi zülü.

Heraka School ya nisung lungjemdaksüba reju ka lir: Ganesan

Dimapur, Metsüremi/March 20 (TYO): Zeliangrong Heraka School indang Jadonang Boys hostel tasen yanglua aliba March 20, 2025 nü Nagaland Angh La Ganesan-i tongti tesemdanger ka ama semzüksüogo.

Town Hall, Tening nung iba sentong agidang, meta talang nung süaka teimla aser takok jenti anguba Zeliangrong Heraka School indang Jadonang Boys hostel semzüksüba ya konang ama bilemer, ta Angh-i ashi.

Iba school ya 1984 küm Janjati Vikas Samiti Nagaland kübok amenokdang primary school ka liasü aser sobaliba tajung wazüka yua shisaliok ajanga tribal nisungtem jenjang ajungkettsü nükjidong nung tenzük, ta pai ashi.

Küm 40 jungnüa arudang Zeliangrong Heraka School ya high school kumogo aser Nagaland,

Assam aser Manipur nung yimtsüng 23 nungi kaketshirtem takum yangertsür, ta Angh La Ganesan-i ashi.

School tangatetba ya mulungsentsü aser sobaliba lungjemdakja tribal aser non-tribal nisungtem nem apu latsütsü lir. Iba school yagi nisung mulungjang lungjemdaksür, ta pai ashi.

Iba school nung azünger honorary teachers aika lir aser pamoki temulung agüja sayuba ya pela agizüker. Tanü modern teaching aids meliaka pamoki yimya balala nung school ya model institution ka kumdaksüogo, ta ashi.

2006 küm nungi tenzüka iba school nung azünger temi HSLC tatidang agütsüba nung noklang shilem takok ngua arur aser ibaji ajanga tesayur aser ketdangsür temi bendanga agütsüba indang ashir, ta paisa ashi.

39 buba Martyrs' Day nung telungjem aser yimjung indang jembi



Kohima nung March 20, 2025 nü Naga Students' Federation (NSF) ajanga 39th NSF Martyrs' Day amungdang kaketshir temi asür nem akhum agüja narolang yutsüba noksa nung angur.

Kohima, Metsüremi/March 20 (TYO): Disturbed Area Act (DAA) atsülangba aser Nagaland nung Indian Police Service (IPS) cadre benokba anema longkak aitba mapang kaketshir ana takum samaba bilemteta March 20, 2025 nü Naga Students' Federation (NSF) ajanga 39 buba Martyrs' Day mungogo.

1986 küm March 20 nü iba longkak aيتدang police-i taochi makai injang khaloktsüba nung Asür Kekuojalie Sachü aser Asür Vikhozo Yhoshü na asü, aser tenati takum bendanga agütsüba ya Nagaland puti otsü nung kanga aroka tera yanga lir.

NSF tenüng nung tir Medovi Rhi-i jembidang asür ana nem akhum agütsü aser parnoki takum bendanga agütsüba ya Naga nunger temeden asoshi nokdakba nung tongtipang mapang ka liasü ta ashi.

Iba mapang Naga nungeri yimtenren tsütsü mepetmesü

adoka tarutsü teimla makaba indang Rhi-i lemsatöp aser kaketshir ana asüba ya takoksa aser Naga nunger asoshi asendenshir nokdakba temaitsü lir ta ashi.

NSF tir tanü putu dang Asür Sachü aser Asür Yhoshü nati bendanga agütsüba asadangtsü ayongzüik aser parnok bilemtetba kisüng masü saka mapa tajung inyaka parnok tushitsü ayongzüik.

"Parnoki bendanga agütsüba amajok nung meindoktsü asen teinyaktsü lir. Parnoki telungjem, ochi obendang aser yimjung asoshi nokdakba jenjang wazüka ayutsü asen mapa lir," ta pai ashi.

Rhi-isa 25th NSF Martyrs' Memorial Trophy ya kanga tongtipang lir ta ashi, koba taküm küm tatemlen ayongzüksü.

Iba asayamung ya linük asoshi takum bendanga agütsür nem akhum agütsüba amai lir, koba timtem ajuruaka tasü ita

nokdakba Naga nunger tanüla temaitsü lir, ta Rhi-i ashi aser Steering Committee ajanga iba sentong ayongzüksü asoshi inyakba tenüngsang agüja, saisapong dak lungjemdaksütsü tashi lir aser arok atema tangatetba alitsü ajungmesor, ta shisem.

Küm 40 jungnüa mapang süyitemaka March 20, 1986 nü atalokba lendong ya asen Naga nungeri teti bilemteter aser NSF Martyrs' Day yagi yimjung asoshi maneni inyakba sayur, ta pai ashi.

Asür nem akhum agüja tarutsü nung yimjung alitsü asoshi federation-i maneni inyaker, ta Rhi-i ashi.

Iba sentong nung NSF secretary games & sports, Kevilelhou Zumu menden liasü aser K. Robvii, Pastor, Mao Baptist Church Kohima ajanga sarasadema tenzük.

(Maneni tapak 2 nung...)

NVBDCP lepa reprangshiba senden tenzükogo; State nung ramen tesamar

Kohima, Metsüremi/March 20 (TYO): State nung anogo ana atema National Vector Borne Disease Control Programme (NVBDCP) lepa reprangshiba senden March 20, 2025 nü Directorate of Health and Family Welfare, Kohima nung tenzükogo.

Iba senden tenzükba sentong nung jembidang, Dr. E. Motsuthung Patton, Principal Director, Directorate of Health and Family Welfare ajanga state nung ramen (malaria) azüokba nung takok tulu anguba indang lemsatapa liasü.

State nung ramen agi shiranger ajema akumba ya healthcare workers aser district ketdangsürtem lungjemer bendanga agüja inyakba temaitsü lir, ta pai ashi.

Takok anguba benjongtsü langa lir, saka iba inyakyim yangi

matemer. State nung ramen okshia samatsütsü asoshi temulungtetba tulu nung asendenshir mera aotsü nüngdaker, ta Dr. Patton-i ashi.

Pai district ajunga nung malaria elimination certification atema mera agia renemtsü ajungshi, kong kanga kumdanga document bendentsü, osang agiteptsü aser guidelines sülen anidaksü nüngdaker.

Northeast nung ramen samadaksüba tsütsü Nagaland ya lenir lir, anungji stakeholders temi atsüngzüka moi maneni inyaktsüla, ta pai ashi.

Danga state tema ramen azüokba nung kanga kera renloka arutar, aser 2027 tashinung ramen samadakja 2030 tashi yamaji alitsü tongtipang, ta ashi.

Ano danga vector-borne diseases, talisa Japanese Encephalitis (JE) aser Dengue

amala tashidak indang tebilemtsü lemsatöpba mapang 2023 küm dengue jatetba du asenok saksalema alitsü sayuba mapang ka liasü, ta Dr. Patton-i ashi.

Ramen samadaksüba den külemi JE aser Dengue nungi kumzüka alitsü aser azüoktsü asoshi sentongtem tashi taitba yanglutsü nüngdaker. Yangji 'surveillance, early detection, community awareness aser vector control measures' tem kanga tongtipang lir, ta pai ashi.

Principal Director-i state aser district health officials aser field workers densema stakeholders ajunga dang maneni kasa tangatetba nung bendanga agütsür inyaktsü ayongzüka liasü.

Nagaland nung ramen ajemdaksüba asoshi Dr. L. A. Singh, Senior Regional Director, RoHFW, Imphal ajanga kasa

sentong nung tenüngsang agütsü aser iba ya danga state temi tang tashinung metongteti lir ta ashi. Pai sub-elimination level nung malaria elimination certification angutsü asoshi inyaktsü ayongzüik.

Malaria elimination certification achayangtsü atema national-level committee ka kumteta lir aser evaluation committee ajanga districts aser health units tem semdangtsü aser inyaksangshi aser documentation nung temulung süa ajitetba sülen certification agütsütsü, ta Dr. Singh-i metetdaksü.

Dr. Neisakho Kere, Joint Director and State Programme Officer (SPO), NVBDCP ajanga sentong nung tayongzükbä o jembidang, 2009 küm ramen agi shiranger nisung 8,489 aliba bilemtet, koba state nung cases

timtiba liasü aser iba mapang nisung 35 asü, ta ashi.

2015 küm malaria elimination program tenzükba sülen cases kanga ajema akum aser 2016 küm nungi ramen tashidak agi asüba mali, ta ashi.

2024 küm malaria cases pongu dang liasü aser Mokokchung, Peren, Phek aser Zunheboto district tem ya "focus areas" ta jangjatetogo, ta Dr. Kere-i ashi aser Longleng nunbo tesüiba küm pongu tashi malaria case kata mali arur, anungji malaria elimination certification atema temsüa lir ta ashi.

Iba sentong nung Dr. Tinurenla Anichari, Deputy Director NVBDCP menden liasü, kong district ajunga nungi DVBOs, DVBCs, MTSs, UVBDS aser Entomologists tem dena liasü.

Minister Along & MLA Dr. Kekhrie nati Education Division Director semdang



Dimapur, Metsüremi/March 20 (TYO): Minister for Higher Education and Tourism Imna Along aser MLA aser Advisor for School Education & SCERT Dr. Kekhrie Yhome nati Director of Education Division Peters Chen Taipei Economic and Cultural Center in India aser MSGs Sampriti Rajkhowa, Education Assistant, Taipei

Economic and Cultural Center in India na den New Delhi nung March 19 nü ajurute pogo.

Mandarin oshi, education aser mapa asoshi maongkatem, talisa scholarships, internships, MoUs, aser exchange program tem ajanga item lenla nung longjemer inyaktsü asoshi sensaksemtsü atema lenirtem ya semdanga liasü.

Nütsünyongsük kanga meilongi renloka aoba ajanga Taiwan nung mapa inyaktsü atema maongka aika lir.

Kasa mapang nung ali rongsen peria maliba ajanga Taiwan-i Human Resource terenlok asoshi senotsü aika intoker. Taiwan ya semi conductor aser education dak sendakba nung alima nung temaba jenjang nung lir.

Dimapur District Planning & Development Board senden menogo

Dimapur, Metsüremi/March 20 (TYO): Dimapur District Planning & Development Board (DPDB) senden March 20 nü Deputy Commissioner office Conference Hall nung menogo.

Senden ya vice-chairmanship & Dimapur Deputy Commissioner, Dr. Tinojungshi Chang lenisüba nung agi aser pai züngsemtem ajak pelashishia agizükba den officer tem dang district terenlok atema ajak longjemer

inyaktsü ayongzüka liasü.

Mapa inyakba tesem nung ajak kümüzüka toktsütsüba indang jembiba mapang department ajak dang ajaki tali jangja alitsü atema Sexual Harassment at Workplace (Prevention, Prohibition, and Redressal) Act benokba indang office nung posters tem maloka toktsütsü tetuyuba agüja liasü.

Onük tongtibangtem rongnung school kar nüngja melenba aser lokti tentettem züngoksema densema liasü,

koba agizükdaktsütsü atema state sorkar dangi abentsü telemetba agiogo.

Senden nung B. Yanrunthang Kikon, Superintendent of Jail, Dimapur, aser Er. Lhuvoyi, Executive Engineer (E), Power, Dimapur na pelashishia agizüka liasü.

Taruba senden nung Public Health Engineering Department (PHED) aser One Stop Centre (Sakhi) nati PowerPoint presentation agütsütsü atema nongloksüogo.

Longleng DC-i African Swine Fever (ASF) poktetba indang metetdaksü

Dimapur, Metsüremi/March 20 (TYO): DC Longleng-i sangdong ka ajanga Yachem yimtsüng nung ak farm nung African Swine Fever (ASF) poktetba indang metetdaksüogo. Laboratory nung tendangba sülen Ak dak iba viral tashidak potetogo aser iba ajanga ak aika süogo.

ASF prokshia meyoktsü atema item containment zone tem ya amenokogo:

i. Infected Zone: tashidak agi kongshir aliba farm telongtet km 1

ii. Surveillance Zone: tashidak agi kongshir aliba tesem telongtet km 10.

Nüburtem anema toktsütsü aser shuirurutem kümüzüka toktsütsü atema tenokdangba kar agütsüogo. Tenokdangbatem rongnung ak, ak chanu aser akshi mesüra pig-derived products tem kecha tashidak agi kongshir aliba tesem nungi bener maotsü mesüra iba tesemi bener marutsü.

Reporting & Cooperation:- surveillance zone nung aliba ak fram, shishilembadak aser

slaughterhouses tem kanga junga meita atatsü aser yimya mesüi ak asüba mesüra ASF asütsü ta temulung melemi bilemba ken o tem local veterinary Department nem idangjisa metetdaksütsüla. Ak farm kiburtem, nüburtem aser shi ayokertemi teka amteper inyakba ajanga iba tashidak aziüoktettsü.

DC-isa, tetuyuba balala agütsür aliba sülen manidakertem temzüng ozüng dak ajemdaker merenshitsu, ta shiogo.

FAC nung Viksit Bharat: Youth Parliament 2025 ayongzüka agi



Dimapur, Metsüremi/March 20 (TYO): Fazl Ali College, Mokokchung-i ayongzüka "One Nation, One Election: paving the way for Viksit Bharat" omen nung ajemdaker Viksit Bharat: Youth Parliament 2025 (District Nodal Round) ayongzüka agiogo.

Anogo ana agiba sentong nung district kübok ICIT, ITI, JMC aser

FAC nungi tetoktepertemi shilem agia liasü.

Out station nungi tetoktepertem rongnung Yingli College, Longleng; Sao Chang College, Tuensang; Wangkao Govt. College, Mon; Zisaji Presidency College, Kiphire nungera densema liasü.

Iba sentong nung jury temji

Dr T Amongla, Principal, People's College; Wapangnaro, Member, MMC; Renben Mozhui, Asst. Election Officer aser Lanutoshi Aier, President, AKM nunger liasü.

Iba tetoktepba nungi tetokteper tajungtiba ter shima state jenjang nung toktepdaktsütsü maongka agütsütsü.

Dimapur nung mejangjaba tasü mang ana nguteta lir

Dimapur, Metsüremi/March 20 (TYO): March 19 nü 0600 ako nung CP office Dimapur anasa tetsür ka tasü mang ngutetba Police Control Room-i osang agizüka liasü.

Iba dak ajemdaker duty party iba tesemi aritepa ao aser tetsür ka (küm 45 nungi 50 tsüngda) Baroda Bank ATM Booth anasa lenmang nung sür aliba nguteta liasü. Iba sülen tenük kuli agütsürtem matsüngda bushisüngdang süa liasü. Asüla ya meshimetsür ka aser yasüta asü asütsü ta bilemer.

Temzüng ozüng kübok tinyaktsü maparen ajak tembangba inyakba sülen tsü mang ya PM examination/identification atema District Hospital Dimapur Morgue-i benerogo.

Asüla yagi black & red Adidas jacket semer liasü. La teka tabelen nung angüsü temerem ka mesür liasü, teka tachichilen kisen ana, tetsüng tablen nung angüsü tanak ka mesür liasü aser long pant navy blue ka semer liasü.

Asür kinunger aser medemertem dang Officer-in-

Charge, Women PS Dimapur (Contact no.7085055027) den t o n g t e p r a t e p t s ü metetdaksüogo.

Maneni March 20 nü 1301 ako meta Govt. Railway Police Station, Dimapur nungi Khatkhathi tsütsülen KM 261/8-9 nung mejangjaba tebur ka sür aliba indang osang agüja liasü.

Osang angazükba sülen duty Officer den duty party iba tesemi aritepa ao aser arishi küm 50 nungi 55 tsüngda asütsü ta temulung melemi bilemba non-local tebur ka tasü mang nguteta liasü. Pa ya train agi menüngset asütsü ta bilemer.

Asüsang yagi long pant aser half pant tanak, coffee sentsü underwear, sweater maroon, temerem aser tanak stripe tola aser waist belt ka kaloker liasü.

Tasü mang ya PM examination aser identification atema to District Hospital Morgue-i benerogo.

Asüsanger kinunger aser medemertem dang Officer-in-Charge, Govt. Railway Police Station, Dimapur. (Mobile No. 7085055021) den

t o n g t e p r a t e p t s ü metetdaksüogo.

Mkg nung World Oral Health Day mungogo



Dimapur, Metsüremi/March 20 (TYO): Lady Bird School, Mokokchung nung March 20 nü World Oral Health Day 2025 mungogo. Iba anogomung ya National Oral Health Programme(NOHP) indang omen "A happy mouth is a happy mind" nung ajemdaker munga liasü.

Sentong nung Dr. Keneitheja Dental Surgeon, IMDH-i, Oral Health koda tongtibang iba indang lemsatepba den tenüngdakba oral hygiene tem indang school

nung tesayurtem aser kaketshirtem nem metetdakja liasü.

Iba anogo nüngdem nung omen dak ajemdaker painting tetoktepba ka ayongzüka agi, koba class 9 nungi Imnatila Lemtur-i koka liasü. La sülen tangbuba jenjang nung class 9 nungisa Lipoktuden Pongen aser tasembuba nung class 7 nungi Bendangyangla Tzudir liasü.

Takok angur ajak nem senpet den kuli kakat tajung agütsüogo.

39 buba Martyrs' Day ... (Tapak 1 nungi...)

Mezhür HSS (iba mapang Kohima English School liasü) aser Government High School Kohima nungi teshimtet kaketshirtem, NSF, Angami Students' Union, Kohima Village Students' Union, Kigwema Students' Union aser asür kinunger temi parnok bilemteta nari yutsü.

Iba anogo nüngtem nung NSF aser Angami Students' Union (ASU) ajanga anogo 178 atema NSF Martyrs' Memorial Trophy Tour to all Naga homeland tenzüka liasü.

Ex-MLA aser Steering Committee chairman Medo Yhokha den NSF tir Rhi nati iba

trophy tour tenzüksü aser iba sentsüprang trophy ya Nagaland, Manipur, Arunachal Pradesh aser Assam state tem aser Myanmar linük nung Naga nunger aliba tesem ajunga atongtsü ta metetdaksü.

Kaketshir anati takum bendanga agütsüba tenüng nung ASU ajanga 1992 nungi küm shia NSF Martyrs' Memorial Trophy ya ayongzüker, koba 1992 jakdang Angami nunger kisüng asaya liasü.

Küm tatemlen anogo 30 asayatsü aliba iba 25th NSF Martyrs' Memorial Trophy nung senpet sen 15 lakh agütsütsü sangdong.

Taoba mapang MLA aser BJP lenir Faqeer Mohd Khan sür lia angu



Faqeer Muhammad Khan

Srinagar, March 20 (Agencies): Taoba mapang Gurez nungi MLA aser BJP lenir, Faqeer Muhammad Khan-i Srinagar kübok Tulsibagg nung aliba pa indang official kidang pa meyong pistol amshia pasasa khaseter lia

tatalokba tejangja metettsü atema ketdangsertemi bushisüngdang tenzükogo.

Pa asüba atema mangyima Brihostibarnü Jammu & Kashmir Assembly nung züngsemtemi minute ana mokremer asür nem akhüm agütsü.

Yimtenren lenirtemisa Jammu & Kashmir nung pai mapa tajung inyakba bilemteta asür nem akhüm agütsü.

Jammu & Kashmir Chief Minister-i X ajanga, "Taoba mapang MLA Faqeer Mohd Khan asüba osang angashia jashir. Pa ya nüburtem atema lenir tajung ka liasü. Ni par kibong den mangyim jashi lemsateper. Pa tanela tesünep nung anisüngzükdakjang ta sarasademtsür. Assembly nung minute ana ola madoki asür nem akhüm agütsüogo," ta metetdaksü.

PM Modi-i Bangkok semdangba sülen Sri Lanka semdangtsü

New Delhi, Metsüremi/ March 20 (Agencies): Ato kilonser Narendra Modi-i Thailand yimtiba, Bangkok semdanga BIMSTEC (Bay of Bengal Initiative for Multi-Sectoral Technical and Economic Cooperation) senden nung adenba sülen April 4 -6 anogotem nung pai Sri Lanka semdangtsü. Tang agi pezübenbuba pai Sri Lanka semdangtsü.

Tesüiba mapang nung 2015, 2027 aser 2019 kümtem nung Modi-i anogo ka-ana dang Sri Lanka semdanga liasü ajisüaka tangbo pai anogo asemnü Sri Lanka semdangtsü.

Sri Lanka Tir, Anura Kumara Dissanayake-i jaokba nung ajemdaker pai Sri Lanka semdangtsü. Iba mapang nung pai Sri Lanka kübok Trincomalee district nung solar power plant ka semzüksütsü sentong lir.

Ita asem tejaklen (December 2024) Indian Ocean Region nung India atema anasatiba kidanger linükji Sri Lanka lir. Indian Ocean nung China-i ambangyima inyaksü merangba mapang ka nung India-i Sri Lanka den defence aser asalentong tesendaktep tashi itshitsü meranger.

April 3-4 anogotem nung Modi-i Bangkok semdanga 6buba BIMSTEC Leaders' Summit nung adentsü. Iba mapang nung pai Bangladesh Interim Chief Adviser Muhammad Yunus-a ajurua jurila senden amentsüa akok.

Yaküm August ita nung nüburtemi longkak aita Bangladesh nung Sheikh Hasina-i aniba sorkar atsüngdokba sülen khenpiga atema Yunus tongti lenir shima lir. Iba sülen Ato kilonser Modi aser Yunus na tsüngda khen danga senden mamen.

atema jembishinüa liasü. Indian Ocean Region nung India atema anasatiba kidanger linükji Sri Lanka lir. Indian Ocean nung China-i ambangyima inyaksü merangba mapang ka nung India-i Sri Lanka den defence aser asalentong tesendaktep tashi itshitsü meranger.

April 3-4 anogotem nung Modi-i Bangkok semdanga 6buba BIMSTEC Leaders' Summit nung adentsü. Iba mapang nung pai Bangladesh Interim Chief Adviser Muhammad Yunus-a ajurua jurila senden amentsüa akok.

Yaküm August ita nung nüburtemi longkak aita Bangladesh nung Sheikh Hasina-i aniba sorkar atsüngdokba sülen khenpiga atema Yunus tongti lenir shima lir. Iba sülen Ato kilonser Modi aser Yunus na tsüngda khen danga senden mamen.



New Delhi, March 20, 2025: Brihostibarnü Parliament nung budget senden tagidak mapang DMK MP temi 'Fair Delimitation, Tamil Nadu will fight, Tamil Nadu will win' ta zülua aliba tola temesüng semer longkak aitba noksa nung angur.



OFFICE OF THE
MERANGKONG SENSO MUNGDANG
P.O. TULI - 798618
DIST. MOKOKCHUNG : NAGALAND.

ASÜR ASOSHI TETUSHI



Dr. T. Senkalong Yaden
(April 21, 1935 - March 15, 2025)

Merangkong Senso Mungdang ajanga **Dr. Senkalong Yaden**, Mr. Takojungba Yaden (Merangkong) aser Mrs. Medemmakla Mollier (Mongchen) na jabaso, shiba dang "Man of Science" ta naroküm agüja liasü, Pa asüba osang angashia kanga sasaba lemsateper. Science lenmang nung len sayur ka, shisatsü sayuba nung temaba jenjang, aser ajak asoshi lenir ka 15th March 2025 anogo nung alima mapa ajak renemer taküm tempangogo.

Pa alima nungi pila aoba ajanga ozü Merangkong asoshi tesasatsü tulu, saka pa taküm ajanga sensosanger ajak talisa tarutsü putu ajak nung tesangwa lenmang aser tajungshi tulu yutsür.

Merangkong Senso Mungdang ajanga Mrs. Theola Thedford Yaden aser par chirnurtem ajak den kasa asüko lemsateper.

Sd/-
PUTIYANGER
President, MSM

Sd/-
OMATSUNGBA
Gen. Secretary, MSM

Gaza nung pua alirtem ajak chioktsüji kanga tongtibang: India

New Delhi, March 20 (Agencies): Bodhbarnü India-i, tang Gaza nung tensa majungba atema India-i tebilemtsü akar, ta ashiba den külemi rara aliba Palestine li nung nüburtem nem teyari agütsütsü atema tayongzükbaga agütsü.

Mongolbar nungi tenzüka Israel-i asentenshir anünglen nungi Gaza amakba ajanga tensa tamajungba akümba sülen India-i tebilemtsü katsüba lemsateper.

Gaza nung health ministry-i ashiba agi, Israel nungeri bomb amshia amakdang nisung 400 dak tali süogo.

Ministry of External Affairs (MEA)-i sangdong ka ajanga, "Gaza tensa atema onoki tebilemtsü katsür. Pua alirtem ajak chioktsüji tongtibang. Gaza

nung nüburtem nem teyari balala agütsütsü onoki ayongzüker," ta metetdaksü.

Mongolbarnü Israel Ato kilonser Benjamin Netanyahu-i Gaza amaktsü tuyua liasü. Paisa, tang amakba ya tetenzüker dang aser tarutsü nunga rara-a dang Hamas den ken o jembitsü, ta metetdaksü.

Netanyahu den Israel ketdangsertemi ashiba agi, shilem asem lemsaba ceasefire mezüngbuba shilemji anogo 30 nungi anogo 60 tashi atsülangtsü atema parnoki benok, ajisüaka Hamas teloki magizükba agi Israel-i asentenshir Gaza amaktsü telemtetba agi.

Israel aser Hamas na tsüngda ceasefire mezüngbuba shilem January ita nung tenzüker aser tan ita tetenzüklen tembanga liasü.

Chhattisgarh kübok Bijapur aser Kanker district na nung Maoists 22 khaset

Raipur/Metsüremi/March 20 (Agencies): Chhattisgarh state kübok Bijapur aser Kanker district na nung security sepaitemi Maoists telungpur mita aoba sülen raradang telungpur 22 khasetogo, ta Brihostibarnü police-i metetdaksü.

Bijapur - Dantewada arrtsülen arem nung khatepdang sepaitemi Maoists telungpur 18 khaset, ta Inspector General (IG) Bastar, P. Sundarraj-i metetdaksü.

Iba rara nungji Bijapur

District Reserve Guard nungia sepai ka asü.

Police-i ashiba agi, Brihostibarnep 7:00 ako nungi tenzüka sepai aser telungpurtemji ajurutepa khatepdang tenzüka liasü.

Ano tanga tatalokba ka nung, Kanker district kübok Kanker-Narayanpur arrtsülen Koroskodo yim anasa arem nung sepaitemi Maoists telungpur pezü khaset, ta Inspector General (IG) Bastar, P. Sundarraj-isa metetdaksü.

(Maneni tapak 8 nung...)



TIR YIMYIM YIMOBILEM (EDITORIAL)

DIMAPUR FRIDAY, MARCH (METSÜREMI) 21, 2025

Ochishidaktsüba putu

Asenok ochi nungi talangka pilar, joko ochiji dang tiyazü ama aser tiyazüang shitak ama kümer aliba putu ka nung, asenok tia ajung, asenoki ochimashi mapa inyaknyüonga meinyaktettsüsa aser tiyazü jembinüyonga mejembitettsüsa computer inyakyim ajanga asenok inyakyim ajunga melenshitsuögo. Iba jagi tanübo asen nungdak inyaktsü atema tsüngdong maoyonga kidang nungi mapa ajak temteter aser asenoki tiyazü tenüung nung mapa aika inyaka tajangzük aginüyonga puteta adoker. Aji oda, tanü government nungi sensaker, mekokmeiner, aluyimer aser tetsür tanurtem asoshi teyari yokbatem tiyazü tenüung nung agizüka agitsü tasakba-tasakba kümdagi. Kasaji, ration card aser job card ama yaa tiyazü tenüung amshia teyari agitsü kanga tasak kümya alitsü südi. Asenokibo teyari dang ngurabangla asen tenünga asemben pezübenä amshia aginütsü, kechiyong asenok asoshi tiyazü jembia government nungi teyari aser tajangzük agitsübaji tiyazü masü saka ochi mapa inyaker amai kümadokogo. Ibayongji asenoki tenla ki asüdanga tiyazü tenüung nung teyari agia yanglur aser mission mapatema auyaba sen agi inyaker, kechiyong item ochimashiba mapatemji asenok asoshi kecha balaka masü, ochi aser shitak amai kümogo. Ano, talisa asenoki yangluba electoral roll nung ya nisung tenüung talika aika enoka alir. Item tenüngtemji aika kasa nisung ser nung tesem ana asem nung enokbatem lir. Atangji, item rongnungji nisung aika pei-i taia ta meteta inyakbabo masütsüa akok, kechiyong nisung aika talidak melenshia-melenshia alir aser pei aliba tesem shia nung eroll nung tenüung zülüoker saka iba tesemji toktsür aodang eroll nung pei tenüung enoka alibaji agentsü mashir aser Election department-ia itemji züngzünga meinyaker. Ano, eroll nung tasürtem tenünga meindoki aliba tesema aika alitsü. Ajisüaka, itemji toktsür asenoki election nung takok angutsü nükchidong yur metetsümonga kasa nisung tenüung tesem ana asem nung enokba aser ano alima nung maliba nisung tenüung dena enoka yangluba electoral roll-tema aika alitsü. Item tiyazü tenüngtemji ajak eroll nungi agentsü asoshi tang Election Commission of Indiai telemtetba agiogo. Atangji, tanga asenok aika eroll nung tenüung aliba ya pei Aadhar card number den sentaktepa lir, saka ano aika mesentaktepi lir, kechiyong Voter ID den Aadhar number sentakteptsüba ya yashi tashibo ozüngbo masü asü, saka asüng nungibo ibai ozüng akümtsü. Iba jagi tang asenok pei alidak eroll nung aliba tenüung ya, ashiko, tesem kar nungbo tasadangka tashi ajemtsüa akok. Ano, asenok asoshi tebilemtsü kaji tesem aika nung tang eroll nung tenüung alirtem rongnunga nisung aika Aadhar card meyanglui alitsüa akok, anungji itemjia shitakba nisungbo taküm lir ser nung eroll nung meinoktettsüsa akümtsü, anungji iba ama takoksaji majurutsü atema tang yongi tesem ajaklen yimten aser lokti lenirtemi nübortem nem Voter ID den Aadhar sentakteptsüsa akümba osang ya sangdongtsüla aser Aadhar card yanglua malirtem ajak tekaratiba nung pei pei meyong Aadhar card yanglua ayutsü metetdaksütsüla. Joko, tanü putu nungbo nisung shia asoshi kanga tongtimbang kaji pei tenüung dang nungibo pei Aadhar card number-ang tongtimbangba kümogo. Aji oda, Aadhar card numberjiang asen tenüung lir, anungji tarutsü nungbo, Laishiba nung shia aliba ama, ashiko, Aadhar card number malirtembo pei nungdak alitsüa aser ayoktsüa makoktsüa akok. Tanüa bank account lapokdang aser tayimtsü nung aeinlen jajadang Aadhar card number nungdaker. Aji oda, Aadhar card number melira asen among majangtettsüsa mapang arudagi. Joko, tanü putu tasenba nung yabo asen yim, asen tzükong, asen kin aser asen kidong indangbo shingaia konga masüngdang saka taolen ajak nung Aadhar card-bo asüngdang. Aji oda, Aadhar card malirtembo election nunga shilem magitettsü aser election nung shilem magitetra, yimten nung senso ka ta züngshitsü makoktsü. Tatsüba agi, tanü putu nung Aadhar number malirtembo tsüraburtemi pei tenüung mejatsü amai asütsü.

OLEMSABANG

TAKAR AKÜMETSÜBA LENMANG 5

~ K. Temjen Jamir

(Iba ocet ya Aoyimti Baptist Arogoi adokba 'Mitangru'
July-December 2024 adok nung angutsü.)

(Yashi adok nungi...)

5. Tsüngremi mulungba inyaktsüla : Asenoki takar kanga kümnüyonga asenoksasa takar akümtsü makok saka takar kümdaktsütsüsa taküm tajung, shisatsü, sentong, tashi aser temoatsü agütsüsangjibo asen Teyanglur Tsüngrem lir, anungji Tsüngrem majangi takar akümtsü asoshi 'Short Cut' mebushitsüla. Aseni takar akümtsü mulungtetba aser inyaknüba sentong aser mapaji Tsüngremi mulungba asü masü (?) ta sarasadema Tsüngrem dang asüngdanga pongmang ajanga aser asangsang nung metettsü merangtsüla. Tsüngrem yimli bushibaji ibaji lir. Iba amaji Tsüngrem dang temelaba asüngdanga asenoki inyakra asenok takar akümtsüsa Tsüngremi moatsütsü ta Mathi 6:33 nung shia lir. Tsüngrem majangi takar akümbaji takar akümer masü saka sensak nung taküm atemtsü tetenzüker ta asenoki metetdi.

Tanü kidang tsüraburtemi pei chirnurtem dang government mapa nung tulur akümtsü ajungshir aser lokti senden nung yimsüsür aser lokti lenirtemia kaketshir aser lanurtem danga kasa tangatetba nung UPSC aser NPSC tatidang ama nung toktepa tatidang agütsür tulur akümtsü ajungshir. Aji oda, asenok ajak nükjidongji government mapa nung tulur akümtsübaji dang asünungji, lanur rongnung kodangsa nisung kati danga government mapa tilaka danga ngudir, asenok rongnung alimai meteta tenüung sangteper aser asenok asoshibo ibaji alima nung takok tulutiba amai züngshir. Ajisüaka, nisung kati industry tuluka tenzüka takar aküm, aser ano nisung katibo dokan tuluka lapoka takar aküm, ano nisung katibo aluyima takar aküm, saka asenoki item takar akümertem nembo tenüngsang agütsütsü mebilemteter saka 'donation' aotsü mapangang parnokji kata mayaoktsüi bilemteter. Aji oda, asenoki mangur aser mezüngoker dang ashi tulur akümtsü merangtepba aser ajungshitepba lima dang nungi kanga agia tuluba aser tajungba lima ka lir, aji takar akümtsüba lima. Iba lima nungjibo tulurtem ya kar kilir aser kar tenyatenponger akümer.

Taoba alima aso 20 buba Ao kin samanir ser kaketshisatsü angazüka tulur akümtsü ajungshitepa merangtep, ibayongji tanü tashi nung Naga nunger rongnungbo Aotsür Aoertemsa teimba government mapa nung tulur kümer alitsü. Joko, asenok asoshibo tulur akümtsü majungshitepyonga takümtsü purtembo odang kümyonga aotsüsa lenmangji pitetogo. Anungji, asenoka aso 21 buba nungbo tangazükba, temetetba aser mapa bushiba nung jenjang ka asetketa tur tulur masü takar akümtsü ajungshitepbajang kanga tongtimbang aser kasa samanir telok to ano len tasen ka piteta aoer asütsü. Aji oda, iba putu tasenba yabo 'Government/ Civil servants putu masü saka entrepreneurs küma business inyakba putu lir. Iba nungjiang pei mapa nung pei kibur küma sademsadema inyaker aser entrepreneur küma kodang pei business ka amentetdir, idangjibo pei aaba anogo ka senji tangar ita sen achir ita ka sen den kasasa mesüra talilaang asütsü. Takar akümtsü merangtepba nung yabo kecha 'reservation' mali, shiri shisa tasen nguteta sen yangluteter, takar akümtsübaji par meyong asütsü.

Takar akümtsü atema business tenzüka ya pei sen agi masü pi sen agi tenzüker, kechiyong business tetezü ya tangar sen apua tajangzük angutsü teimla nung mapa tenzüka ka lir. Takar atema takar akümtsü menüngdak, anungji yangi takar akümtsü lenmang kar sayuba ya sensakertem shirnoki takar kümner parnok asoshi alitsü. Parnokji takar aküm nung dang Nagaland-a takar akümtsü aser government mapa nung inyaker tulur-tilar ajak nem ita sen agütsütettsü aser terenlok mapatema shitak inyakteta Nagaland topur junga akümtsü. Item ajakji India government dang meshia tulurtem nem ita sen agütsüba nungi masü saka asenok sensakertem takar akümba nungi tenzüksü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Gujarat CNI nungi pastor temi Amritsar Diocese semdang



Amritsar, March 20, 2025 (Agencies): Gujarat Diocese, Church of North India (CNI) nungi Bishop Silvanus Christian leniba nung Khristan putir 140-i tanela asentenshi sentong atema Amritsar (Punjab) nung aliba Arogo semdang.

Iba sentong ya Rev. Manoj Charan-i ayongzüka liasü. Rev Manoj ya tang CNI, Bishop of Bombay Diocese nung Acting Deputy Moderator inyaker aser pai Bhopal Diocese aser Diocese of Amritsar-a repsema repranger.

Diocese of Amritsar indang Facebook page ajanga, "Iba sentong ya meyipa reprangshiba aser telongjem" sentong ka liasü, ta metetdaksü.

Iba sentong ajanga tanela jenjang meyipa reprangshitsü, longjemtsü aser Arogo ana nungi putirtemi shisa lemsateptsü atema maongka angu.

Gujarat Diocese nungi pastor temi Punjab aser Himachal Pradesh na nung aliba Arogotem semdang. Amritsar semdangba mapang nung parnoki Attari arrtsü-a semdanga liasü.

Gujarat nungi pastor tem Amritsar tonga aruba mapang nung ADTA Secretary Daniel B Das, Diocese of Amritsar nung Administrator, Rev Ayub Daniel aser CNI nung taoba mapang General Secretary, Alwan Masih nung densema lenirtem aikati parnok agizüka liasü.

Iba sentong nung jembidang Bishop Silvanus Christian-i, "Kibuba Yisu Khrista Kangki nung asüba anogomong Good Friday aser Pa tasü nungi shia aruba Easter atongtsü mapang ana nung lia Yisu Khristai meimchirtem nem teimla agütsüba, temeim sayuba aser temenen nungi kümzükba asenok nem nenshia metetdaksür. Easter mongpu nung asenok nem yimjung aser tepela agüjang ta sarasademer. Tsüngrem tenzükertem ama asenoki maneni Pa temeim osang proktsü ajungmesor," ta metetdaksü.

Diocese of Amritsar-ia social media ajanga, "Gujarat Diocese nungi asen adianutem den temeim lemsateptsü atema maongka anguba atema pelar, aser tarutsü nunga maneni Gujarat Diocese den longjemtsü

aser amalitepa inyaksü yongyaa atar," ta metetdaksü.

Bishop Manoj Charan-i, "Asentenshi sentong ajanga tanela jenjang meyipa reprangshitsü, telongjem akatsü aser Gujarat o Amritsar nungi putirtemi shisa lemsateptsü atema maongka angu. Diocese-i maneni tarutsü nunga item ama sentong ayongzüka agitsü," ta metetdaksü.

Iba sentong nung Diocese of Amritsar nung Finance Officer Om Prakash, Legal Advisor Sushil Daniel, Rev Rajni Bala, Rev Stephen aser Rev Rajkumar nung densema Arogo nungi ketdangsertem aika dena liasü.

Tawa Bishop Manoj Charan-i Diocese of Amritsar in-charge agizüka liasü.

Tan ita tetenzüklen mapa agizükdang Bishop Charan-i Khrista osangtajung prokba nung tongti shilem agitsü, shisaliok aser social outreach program balala nendaka inyaksü nangzüka liasü.

Paisa, region nung tesünap aser yimjung alitsü atema yimsü balala amanger lenirtem tsüngda ken o jembia shisa lemsateptsüji tongtiban, ta ashi.

Azerbaijan nung Khristan 23 chiochtsü atema Trump dang teyari meshir

March 20, 2025: US Tir, Donald Trump dang Azerbaijan sorkari pua aliba Khristan 23 chiochtsü atema yaridaktsüner, ta Khristan lenirtemi mepishia metetdaksü.

US Tir election mapang nung Trump-i reshikangshiba Khristantem yaritsü nangzüka liasü.

Khristan lenirtemi shidi ka ajanga Tir Trump dang Armenia nung Khristan 23 aser Azeri Khristan ka chiochtsü atema yaridaktsüner, ta mepishi.

Advocacy group Save Armenia leniba nung Khristan lenirtemi March 11 nü Trump nem iba temepishiba shidi nungji sign sür agütsüogo.

Iba shidi nungji sign süa alirtem rongnung taoba mapang United States Ambassador-at-large for International Religious

Freedom, Sam Brownback, missionary Sean Feucht, National Religious Broadcasters Tir aser CEO Troy Miller, U.S. Commission on International Religious Freedom Commissioner David Curry, Save the Persecuted Christians Executive Director Dede Laugesen aser meimchir temeden atema inyaker, Alveda King nung densema lir.

Khristan lenirtem jagisa 2024 küm Tir election atema nüboyimba mapang Trump-i reshikangshi ajangshiba Armenia Khristantem pusemba atema pa dang pelaba lemsatep.

"Na ama lenir ka, alima nung lenirtemi tsübuba lenir ka aser lenirtem akhümtsübuba lenir kati dang iba tensa ya melenshitsütetsü ta parnoki amanger," ta shidi nungji shia lir.

"Küm ana tejaklen Azerbaijan-i Armenia nung Khristan 120,000 shi pei kidang nungi meindokogo, aser iba mapang nungji Biden administration-i ibaji nokdangtsü mesüra aibelenertem nem temerenshi agütsütsü memelungi liasü," ta Khristan lenirtemi metetdaksü.

"Iba mapang nungjagi tenzüka sorkari Armenia nung Khristan 23 den Azeri nung Khristan ka pua lir aser mapang shia parnok reshikangshir. Item Khristantem nai (Trump) dang kümzüktettsü akok," ta parnoki Trump nem metetdaksü.

Save Armenia indang website nung shia aliba agi, 301 AD nung Khristan yimsü mezüng agizükba linükji Armenia liasü. 1915-16 küm Armenia nung Khristan million 1.5 tepseta liasü.

ANOGO ABEN TSÜNGREM DEN

Ain adokba asoshi tasüngdangba ka

Kibubai ashi, "Na ain adoktsü tim asü?"

Yohan 4: 4.

Yonai pa nem akhüm agütsüba süngzü aroba ngur jashi, saka Ninevi nung 120,000 atema pai kecha jashia mebilem.

Tanü alima nung sensaker, maka-maiter aser timtem tapu balala agi kangshiba pur jenti saka takartemi parnok atema mebilemtsür. Item timtembapur atema sorkari teyari sentong meyanglutsüba atema sorkar dang jashitsü akok. Sensaker aser leni maortem asoshi aria bilemtsü asenoki aiben mapang magütsütetter. Parnokji lokti nung alitsü mapet ama bilemer.

Tsüngremi Yona dang asüngdangba tasüngdangbaji asenok danga asüngdangtsü akok. Ibai pei sasa meyipa reprangshia Tsüngrem taochi dangi pei sasa meyiptsü aser tangar asoshi aria bilemtsütsu tasüngdangba ka lir. Asenok rongnung sensakertemji Tsüngrem taochi aser aria bilemba nüngdaker asü? Item tebilemtsütem temenen, merumeru, kin telemsa, ochi mashiba aser tenükmerem nungi madoker ma? Külem inyakertem dang aseni jashia bilemba tejashi nung asenok metena lir ma? Asen tejashi jagi, parnoka aser asenoka meyarir. Iba ama meimchiri meimchir dang meima mapa tajung meinyakba lokti aser Khrista mesüka aria bilemba sayua mapa tajung inyakba nung asen sasa bendanga agütsübaji koda kanga agi tajungba lir! Parnok dang temenen tatok anguba tekumtet osangtajung lemsateptsübaji koda jangratemtsüka asütsü.

Delhi kübok Mayur Vihar kiyong nung St. Mary Tenla ki amak

March 20, 2025: Amongnü (March 16, 2025) Delhi kübok Mayur Vihar kiyong nung Mary Tenla kidang Mary kürakyanglu raksatsüogo.

Iba Tenla ki ya Syro-Malabar Arogo indang lir.

Osang angazükba agi, 12:30 ako meta mejangjaba nisungtem motorcycle ka nung arua kürakyanglu nembanga aliba aina nung long onloktsü. Iba tatalokba sülen kürakyangluji tanga tesem kati bener ao.

Tenla ki anasa alirtemi, motorcycle nung arusangji 'helmet' sema maliasü saka parnoki nisungba maitsüji mejangja, ta ashi.

Delhi Police-i iba tatalokbaji bushisüngdangtsü atema CCTV nung tangoka aliba noksa bener ogo aser anasa alirtem danga asüngdangya-a liasü.

Tang tashi nungbo Arogo lenirtemi ken o mebenok aser ken o benoktsü tebilemba mali, ta metetdaksüogo.

Delhi kübok Mayur Vihar kiyong nung Malayali (Kerala) nung Khristan nütsüng aika

lir. Tesüiba küm ishika tsüngda North India tesem balala nung Tenla kitem raksatsüba tatalokba aika lir. St. Mary Arogo ya Syro-Malabar Arogo kübok lir.

Khristantem temeden atema inyaker Dr. John Dayal-i, "St. Mary's Church amakba atema tebilemtsü akar, talisa North India tesem aika nung item ama tatalokba osang aika onoki bendena lir. Ano tebilemtsü kaji, item ama tatalokba anema Arogo lenirtemi ken o benoktsü arendaker. Ano külen minorities anema inyakba tatalokbatem liaka police aser sorkar ketdangsertemi kecha meinyaker. Official süa ken o mebenokra item ama tatalokba ya national crime statistics nung mezüngoktsü, aser ibaji ajanga timtem teraji kechiar masadangteter," ta metetdaksü.

Paisa, "Ajisüaka ketdangertemi iba tatalokba ya jungjunga bushisüngdangtsü ta ni imlar. Ni Arogo lenirtem danga item ama tatalokbatem anema ken o benoktsü mepishir," ta ashi.

AO OSHI ANGAZÜKDAK:**TANÜ ANGAZÜKTSÜBA OJANG****Teliwa**

(n) tajung samaadokba (expired)

* Taküm nung teliwa mapangbo shingaia maginer.

Teliwar

(adv) tamajung küma raksaa aoer (deteriorate)

* Chiyongtsü ajak teliwar makümdang chia adoktsüla.



Tir Yimyim

OLONG PAITEP # 7097

1			2			3			4	
			5		6		7			
8										
			9							
	10									
								11		12
			13				14			
15						16				

TIPLIN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ___ adenshi - (4)
14. Tsünüsenbongtsü adokdak - (3)

OLONG PAITEP # 7096 TELANGZÜBA**TIPLIN :**

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Sürä.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Tajü, 21. Ano,
22. Onü, 23. Kua.

Assam: Amritpal nem teyari agütsür 7 Punjab-i anirogo

Dibrugarh, Metsüremi/ March 20 (Agencies): Amritpal Singh nem teyari agütsür parnok tenetprongla Punjab police nem bendanga agütsüba sülen Dibrugarh Airport nungi Punjab-i anirogo.

Brehostibarnü Amritpal Singh nem teyari agütsürtem bendanga agütsüba maparen ajak tembanga inyaka liasü.

Dibrugarh Central Jail nungi chiokba sülen Superintendent of Police (SP) Harinder Singh Gill-i anir Punjab police team nung sepai 25-i item nisungtem bendanga agia liasü.

Aija alir parnok tenet rongnung Daljit Singh Kalsi, Kulwant Singh Dhaliwal, Gurmeet Singh Bukkanwala, Harjit Singh, Bhagwant Singh alias Pradhan Mantri Bajek), Basant Singh, aser Gurinderpal

Singh nunger densema lir.

Ketdangsürtemi parnoki ya tayimtsü balala ana nung Dibrugarh Airport nungi anirogo.

Kasa mapang nung sorkari Amritpal Singh, Papalpreet Singh, aser Varinder Singh Johal nunger NSA kübok maneni sota ayutsü aser parnok sota ayuba ya 2025 küm June ita tembangtsü.

Aam Aadmi Party (AAP)-i aniba Punjab sorkari Waris Punjab De züngsem tenet anema NSA reinvoke masütsü telemtdetba agiba sülen tang iba telemtdetba agiogo. Parnok küm ana atema sota ayutsü latetstür aliba ya March 19 nü tembanga liasü.

Temettetsü kaji 2024 general elections nung Amritpal Singh-i Dibrugarh Jail nungi Khadoor Sahib Lok Sabha menden kokogo.

Manipur: NEFR GM-i Jiribam-Imphal railway project asadang

North Eastern Frontier Railway nungi general manager Ratakumar Srivastava-i anir telok kati Noney district kübok Manipur nung Khongsang railway station semdangba noksa nung angur.

Imphal, Metsüremi/March 20 (Agencies): General manager Ratakumar Srivastava-i anir North Eastern Frontier Railway team kati Manipur kübok Noney district nung Khongsang railway station semdanggo.

Iba team yagisa sen crore 14,322 intoka yangluba Jiribam nungi Imphal railway project nung tang mapa tinyakdak alibatem asadanga liasü.

Iba tesem semdangba mapang Srivastava-i, tanga inyaka aliba mapatem, talisa

tunnel, apu aser railway line tem asadang aser Jiribam Khongsang railway staff tem den sensaksema liasü.

Indian Railways network den Imphal sendakteptsütsü atema sorkari Jiribam-Imphal new railway line project ya benok, koba km 111 talang lir.

Jiribam nungi Khongsang tashi railway line ya km 55.36 lir aser iba ya 2022 küm commission sütsü aser Imphal tonga aotsü atema maparentem maneni inyakdar. Ketdangsürtemi ashiba agi, iba project ya sen crore 22,274

intoka yanglutsü ta asatetogo aser 2024 küm March 31 nü tashi nung crore 14,423 bo intokogo.

2024-25 financial year atema sen crore 1,200 lemsütsüogo.

2024-25 financial year nung 2025 küm February ita tashi nung Jiribam station-i freight rake 15.5 achaayangogo aser Khongsang station-i rake 16 achaayangogo.

Ajisüaka tetsükdaksü balala aliba ajanga iba project ya aiben anena atatsüsa küma liasü.



GOVERNMENT OF INDIA
MINISTRY OF TEXTILES
OFFICE OF DEVELOPMENT COMMISSIONER FOR HANDLOOMS
Sant Kabir Handloom Award and National Handloom Award
for the year, 2024

Handloom sector nung alakteta shilem tajung agiba atema 2024 asoshi tsünglanglen agüja aliba handloom awards atema India nung alirtem nungi applications meshir.

Tejangja tsünglanglen agütsür:

Sl. No.	Name of awards	Category	Sub- Category	No. of Awards
01	Sant Kabir Handloom Award (SKHA)	Weaving	Weaving	03
			Exclusively for women weavers (Sant Kabir Handloom Award- Kamala Devi Chattopadhyay)	01
			Languishing Weaves	01
			Tribal Weaves	01
			Total (A)	06
02	National Handloom Award (NHA)	Weaving	Weaving	08
			Exclusively for women weavers (Sant Kabir Handloom Award- Kamala Devi Chattopadhyay)	02
			Young Weavers (age not more than 30 years)	01
			Divyang Weavers	01
			Languishing Weaves	01
			Tribal Weaves	01
		Design Development		02
		Marketing of Handloom products		02
		Start-up ventures/Producer company		01
		Total (B)		19
		Total (A + B)		25

- Eligibility criteria, age, experience, application form amala dak sendakba osang tali tejangjaba Office of the Development Commissioner for Handloom (www.handlooms.nic.in) website nungi download sütettsü. Osangtsüsang teyari atema applicant-i anasa aliba Weavers Service Centre (WSC) den tongteprateptsü akok.
- Application ya yimya ana nung agütsütsüla, i.e., online aser offline. Online applications ya My Handlooms portal (<https://myhandlooms.gov.in>) ajanga agütsütsüla. Iba den offline applications ya nüngdakba ajak inoka renemer hand-woven samples (kobasa nüngdaker) den online application printout ka aser danga nüngdakba documents ajak anasatiba WSC nem May 5, 2025 tashinung agütsütsüla.

CBC 41102/11.00072425

DEVELOPMENT COMMISSIONER HANDLOOMS

Melungnen O



Onoki teti meima aliba **Mrs S.Arenla Longchar** (Christian Education Director, Waromung Baptist Arogo) La shirangba mapang nungi asükhu anogo tashi kija aser lokti kwinakadi yaritepogo aser ozü kibong tang temeim mapa tulu sayuogo, nenok ajak dang temolungjang taroktiba nungi kangasa pelar aser onoki ibai teti temulung nung ayutsü aser Takar Tsüngremi teyariteper ajak moajangma ta ozü kibong sarasadem. Talisa item tenüng yabo metetshi meliteter.

- 1. Doctor, Nurses & Chaplain Zion Hospital Dimapur,
- 2. Waromung Baptist Arogo & Arogo kübok Ministrial ajak
- 3. Ao Baptist Arogo Mungdang (ABAM)
- 4. Ao Baptist Arogo Christian Education Directortem/APCE
- 5. Dimapur Area Christian Education Directortem/APCE
- 6. Old ShowbaAo Baptist Arogo Women Ministry & Education Ministry
- 7. Yimsem Ao Baptist Arogo Women Ministry
- 8. Naga United Ao Baptist Arogo Christian Education Ministry
- 9. Pongolu Youth
- 10. Jubilee Memorial School Mkg.
- 11. Shri Temejenmenba MLA 29th AC Jangpetkong
- 12. Dimapur Waromung Fellowship
- 13. Dimapur Waromung Senso Telongjem
- 14. Chomoukedima Area Waromung Fellowship
- 15. Mokokchung Town Waromung Fellowship

~ Temeim Kinungbo aser Chirmurtem.



DIBUIA LAISHIR TELONGJEM

P.O. Mangkolemba, Mokokchung: Nagaland

Nükjítong: "Khrista aser Arogo Asoshi"

TENÜNGSANG AGÜTSÜR

Dibuia Senso nungi Laishir **Dr. Imlimar Pongen**, (Asür Longrimeta Pongen aser Asür Twasen Imchen, tena jabaso), pai Doctor of Philosophy (Ph.D) Sam Higginbottom University of Agriculture, Technology & Science, Gospel and Plough Institute of Theology, Allahabad, UP, India, nungi takok tajung ngutetba asoshi Dibuia Laishir Telongjemi konang tetushi aser tenüngsang tulu agütsür aser Tematiba Tsüngrem tenüng asanger. Dr. Imlimar Pongen-i züluba thesis "Embracing the 'other' as created in the image of God in the context of violence in India" liasü.



Tsüngremer yimli asoshi ne sempet aser wadang tali moajangma ta Dibuia Laishir Telongjemi tarutsü anogotem asoshi maneni sarasademtsür.

Sdl/-
Imsuyanger
Chairman

Sdl/-
Rongsenchila
Secretary

ALI TAYOKTSÜ LIR

- 1. Near Showuba fly over, no earth filling. @310 per. sq. ft.
- 2. 190 per. sq. ft. & 37 per. sq. ft.

Contact : 9863826159

US-i Ukraine indang power plants ketdangsütsü Trump-i ashi

Washington, Metsüremi/March 20 (Agencies): Russia Tir Vladimir Putin den phone ajanga jembir anogo ka lir US Tir Donald Trump-i Ukraine Tir Volodymyr Zelenskyy den phone ajanga ghonda ka jembio.

Iba sülen Zelenskyy-i Trump lenisüba kübok teti asoshi yimjung taküm ngutettsü amanger ta ashi.

Ukraine indang nuclear plants tem nung US kibur

akumtsü indanga jembi, ta White House ajanga ashi, saka mapang tatsüka lir Zelenskyy-i iba ya Russia kübok aliba Zaporizhzhia facility indang lir ta ashi.

Bodhbarnü tena phone ajanga jembiba ya Zelenskyy-i taoba ita White House semdangba dang nungi tajungba, kong lenir ana aser US Vice President JD Vance nunger o intepa liasü.

(Maneni tapak 8 nung...)

Israel-i asendenshir Gaza amaker, nisung 70 tepsetogo

Gaza City, Metsüremi/March 20 (Agencies): Brehostibarnü Israel-i ground operation inyakyim ulushiogo ta ashi aser tesüiba anogo ishika tsüngta Gaza nung tayimtsü amshia amakdang nisung noklang aika tepsetogo. Israel-i tayimtsü amshia Brehostibarnü amakdang Palestine nunger 70 shi tepset aser aika yirutsü, ta Gaza health ketdangsür kati ashi.

Israel-i Gaza Strip north aser south tsütsü ki kar nung tenük yoker amak. Israel-i tongtipang ki o jen nung tenük yoker amakdang Hamas lenir pongu-trok ka tepsetogo aser maneni Hamas anema rarar. Iba den külemi ano Palestine nungertem Gaza south tsütsü nungi north leni maitdaksür, ta Israel mitkari ashi.

January ita nungi tenzükba ceasefire laoba sülen sepaitemi central aser southern Gaza

ground operation aser tenzükshiogo, ta Israel mitkari Bodhbarnü ashi.

October 2023 nung iba rara tenzük arudang tayimtsü amshia amakba nung Palestine nunger 400 dak tema tepseter anogo ka lir asendenshir ground operations ya tenzükshi, ta osang ajanga ashir.

Mongulbarnü nungi tenzüka tayimtsü amshia amakdang Palestine nunger 510 tepsetogo aser parnok rongnung tesadang ka dak tali tetsür aser tanurtem lir, ta health ketdangsür ajanga metetdaksü.

Israel mitkari ashiba agi, par operation ya Israel-i Netzarim Corridor amokbanga aliba tashi lir, koba ajanga Gaza ya north aser south sadangtsür. Iba ground operation nung shilem ka ama sepaitem ya Netzarim Corridor tiyong tashi ao.

Kasa mapang Hamas-i

ground operation aser Netzarim Corridor telungi aitba ya ita ana ceasefire agreement nung aibelen tulu lir ta ashir. Iba telok yagi sangdong ka nung parnokbo tezüngzüktep nung shidak nodaka lir ta ashi aser tetsüngtai ia yimjung ken o jembirtem dang pei mapa inyaksü ayongzük.

Tetsüngtai ia yimjung ken o jembirtemi anatsülen meranga jembir, saka terenlokba mali, ta Hamas ketdangsür temi ashir. Ajisiüaka Israel-i amakba sülen par teloki tayang kepzüksü sangdong tejangja agüja mali.

Hamas telungpuri October 7, 2023 nü Israel nunger alidak maka nisung 1,200 tepseter ano nisung 250 dak tema pua bener aoba ajanga iba rara ya tenzük.

Iba sülen rara nung Palestine nunger nisung 49,000 dak tema tepsetogo aser Gaza ya aoyi kumtsüogo ta Gaza health ketdangsür temi ashir.

Taoba Pakistan PM Nawaz Sharif mapa tasen nguogo

Lahore, Metsüremi/March 20 (Agencies): Pakistan indang taoba ato kilonser Nawaz Sharif ya Punjab province nung par jala Maryam Nawaz sorkar nung mapa tasen ka nguogo.

Asemben ato kilonser inyaka alisang ya Lahore Authority for Heritage Revival (LAHR) indang patron-in-chief inyaksü, anungji pai Lahore nung colonial mapang yangluba ki o jen aika yanglushiba ketdang asütsü.

Punjab administration ajanga sangdong ka nung Sharif tambusang ya LAHR indang patron-in-chief inyaksü ta metetdaksü. Pai Lahore yimti tejen tasenba kuma yanglushiba maparen ketdangsütsü.

Tepuokdak alisang taoba ato kilonser Imran Khan'er party-i Pakistan nung tang yimsü

tesüdang Pakistan Muslim League-Nawaz tir ya atala sorkar mapa anguba atema tenüngsang agüja liasü.

"Nawaz Sharif ya 2024 election nung par party maksüja tamakok ajurur anisüngzüka liyaa liasü. Nüburtemi Imran Khan shimba rakzük aser Nawaz aser Zardari party tem - PMLN aser PPP nem agütsü. Tang Nawaz'er jala Punjab Chief Minister Maryam-i pa nem inyaksü mapa kar agütsü. Retired politician ka ama Nawaz temang anema alitsü asoshi mazüngi ki o jen tejen yanglushiba mapa inyaka pa takum mazüngi alitsü ya tajungba asütsü," ta opposition Pakistan Tehreek-e-Insaf lenir Shaukat Basra-i Brehostibarnü osangbener dang ashi.

Nawaz ya pezüben buba ato kilonser akumtsü asoshi 2023

küm London nungi meyipa shilang, saka mitkari tenu Shehbaz Sharif ang iba mapa atema "puppet" tajungtiba asütsü ta shima Sharif tambusang pa zübu menaka yutsü, ta pai ashi.

"Tang Nawaz Sharif ya jara agi atsübanger aliba Lahore yimti nung ki o jen tejen tem anepalua angutsü," ta Basra-i anemsü agi ashi.

Sorkari ki o jen 100 dak tema "historical heritage sites" ta sangdonga lir. Nawaz-i Walled City Authority Lahore dang Lahore indang heritage yanglushitsü asoshi sentong tejangja meshia liasü.

"Old Lahore ya tebour kanga tajung aser chichiba form nung yanglushia ayutsüla. Samar aliba asen senmang wazüka ayutsü ya linük teinyaksü lir," ta Sharif-i ashi.

Mitkar nem tashi tali agütsüba ozüng ka Indonesia nung agizükogo

Jakarta, Metsüremi/March 20 (Agencies): Indonesia indang parliament ajanga mitkar züngsem temi sorkar mapa tali inyaksüba ozüng ka agizükogo, koba ajanga armed forces temi civilian inyakyim nung shilem tali agütsü ta aitsür.

Tir Prabowo Subianto indang coalition ajanga Brehostibarnü benokba armed forces law ya tashi tait armed forces ajanga atsüshiba linük nung mitkar tashi ulushitsü nükjidong nung lir.

Iba amendments ya civil society telok balalai aitsür aser ozüng ya ajanga taoba tir Soeharto mapang ama mitkar tanishir temi civilian inyaksangshi ajak amokbangtsü tashi agütsütsü ta ashir.

Nübur inyakyim nung mitkar shilem tali agidaksütsü

merangba ya rights groups temi aija arur, kechiaser iba ya ajanga tim masüba nung yimten tashi amshitsü, meimchir temeden nung aibelentsü aser army nem 'political impunity' agütsütsü tsübor.

Democracy telok balala nungi longkak aiter temi Indonesia yimtiba Jakarta nung longkak aittsü ta shiogo. Bodhbar nikongdang kaketshir telok tilaka iba ozüng anema longkak aittsü asoshi parliamentary building tesülen adenshia liasü. Parnok mapang tatsüka lir senshi.

Taoba küm October ita tir akumsang Subianto ya Soeharto kübok special forces commander ka liasü aser pai tanur atema angati chiyongtsü agütsüba pa idang flagship programme densema civilian

areas nung armed forces inyakyim ulushir.

Defence Minister Sjafrie Sjamsoeddin-i ashiba agi, geopolitical temelenshi aser global military technology ajanga mitkar tajungba kuma melenshitsü nüngdaker.

Taoba military law kübok officers tem government agencies 10 tashi nung tenzükteta liasü. Tang ozüng tasenba kübok military officers tem state institutions 14 tashinung inyaksü melar.

Attorney general indang office, state secretariat aser counterterrorism agency densema civilian temi amba post tem mitkar tanishir temi amtsüsa lenmang tesademba lapoktsüba den külemi ozüng tasenba yagi officer indang retirement age atsülangtsü.

7buba Inter-Departmental Badminton championship tembangogo



DC Wokha, Vineet Kumar, tetushi tejaoker Nzano P Kikon den inter-departmental badminton tournament nung shilem agirtem tangokba noksa nung angur.

Dimapur, Metsüremi/March 20 (TYO): 7buba inter-departmental badminton championship, indoor badminton stadium, Wokha nung March 18 aser 19 nü asayaogo.

Iba asayamung ya Wokha District Sports Council-i ayongzüka kanga takok ngua asayaogo.

Asayamung nung tebur tarep asaya final nung Rhovisie aser Haidingsap (Police) nati Er.Yanthanshan aser Dr.Ezao (PWD) na koka liasü.

Tarep temeyoktep asaya

nung Libemo Jami aser Nsungbeni L Tungoe (Youth Resources & Sports), Dr. Alice aser Dr. Renthungo Patton (Mt. Tiyi College) aser Echungbemo Erui aser Rechalungle (District Administration) nung mezügbuba, tanabuba aser tasembuba nung asaya tembang.

Tetsür tarep asaya Nsungbeni aser L.Nzanbeni Kikon (Youth Resource & Sports) nati akok aser Dr. Alice o Soreni Odyuo (Mt.Tiyi College) aser Aren Jamir o

Motile (Medical) nung tanabuba aser tasembuba jenjang nung liasü.

Asayamung lapokba sentong nung Wokha Deputy Commissioner alakteta jaoker liasü aser asayamung shibangba sentong nung Wokha Town Council Dy. Chairperson Nzano P Kikon tetushi tejaoker liasü.

Ajak senteper department 21-i iba asayamung nung shilem agiogo. Asayamung nung tebur asayar 55 aser tetsür asayar 17-i shilem agia liasü.

Champions Trophy akokba atema India nem crore 58 agütsütsü

Metsüremi/March 20, 2025 (Agencies): Iba ita tetenzüklen ICC Champions Trophy akokba sülen Board of Control for Cricket in India (BCCI)-i India team nem sen crore 58 senpet agütsütsü, ta board-i Brehostibarnü sangdonga liasü.

"ICC Champions Trophy 2025 akokba sülen India team nem senpet sen crore 58 agütsütsü telemtetba agiba Board of Control for Cricket in India (BCCI)-i pelashishia sangdonger. Iba senpet ajanga asayar, coach, support staff aser Men's Selection Committee züngsemtem tushitsü," ta kasa sangdong ajanga metetdaksü.

March 9 nü Dubai

International Cricket Stadium nung final asaya nung India team-i New Zealand koka Champions Trophy tasembuba koka liasü.

Team nung asayar 15 densema liasü aser parnok ajak nem BCCI-i sen crore asemsem agütsütsü. Iba den bendenloksema BCCI-i 2025 Champions Trophy (sen crore 20) akokba senpet ajak ya India team nung asayartem nem dang lemtsütsü telemtetba agiogo.

Iba asayamung nung Rohit Shama-i aniba team yagi asaya ka nung danga tamakok mongui parnoki asaya pongu akok.

Group stage nung parnoki Bangladesh aser Pakistan na

wicket trokrok agi akok aser iba sülen New Zaland run 44 agi koka liasü.

Semifinal nung parnoki Australia wicket pezü agi koka final-i ai.

Kasa mapang nung BCCI-isa India team head coach Gautam Gambhir nema asayar nem agütsüba ama sen crore 3 agütsütsü aser support staff ajak nem sen lakh 50 agütsütsü, ta sangdongogo.

India chief selector Ajit Agarkar nem sen lakh 30 agütsütsü aser national selector parnok pezü nem sen lakh 25 agütsütsü. Dubai nung Team India indang contingent nung densema aliba BCCI staff ajak nem sen lakh 25 agütsütsü.

Chelsea-i Quenda & Essugo na den tenangzüktepba yangluogo



Geovany Quenda

Dario Essugo

Metsüremi/March 20, 2025 (Agencies): Chelsea-i pound million 62.4 yong Sporting midfielders Geovany Quenda aser Dario Essugo na den tenangzüktepba yangluogo, ta iba Portuguese club yagi ashi.

Arishi küm 17 tain winger Quenda ya pound million 44 agi alizükogo, ta Sporting website nung metetdaksüba sangdong nung shia lir. Ajisüaka pa 2025-26 season tatem tashi Lisbon

nungi asayatsü.

Lanur asayar ya tang asaya aliba season nung Sporting indang first team-i ai aser September ita Champions League nunga mezügbuba asayaogo.

Kasa mapang nung arishi küm 20 tain defensive midfielder Essugo-a Las Palmas nung oa loan nung asayaba sülen lemluwa Stamford Bridge-i aotsü. Sporting-i ashiba agi, pa

den pound million 18.4 agi tenangzüktepba yangluogo.

Pai Spain nung kanga junga asayadar, ajisüaka taoba asaya pezü nung pa red card pezü chir lir. Chelsea fan tem Quenda asayba repringtsü atema mapang tatsükabo atatsüsa akümtsü, saka Essugo bo Enzo Maresca-i aniba team taküm lemluwa United States nung oa Fifa Club World Cup asayatsü aliba nung asayaba angutsü akok.

Portugal nung asayar ana ya London nung amendaker aliba club-i alizükba lanur asayartem rongnung tesüsabuba asütsü, shirnoki taküm lemluwa ano arishi küm 17 tain asayar ana anir arutsü lir.

Brazil nung Estevao Willian aser Ecuador nung Kendry Paez na taküm lemluwa Chelsea nung arua adentsü.

INDIA OSANG :

Tapak 3 nungi...

Chhattisgarh kübok Bijapur aser...

Security sepaitemisa teraradak mapang nung telungpurtem indang automatic prangpong aika angü. Raraba tesem anaprongla nungji maneni sepaitemi telungpurtem mita odor, ta police-i metetdaksü.

Taoba hopta nunga Chhattisgarh kübok Bijapur district nung Maoists telungpur 17-i pei sasa police matsügdangi arua liasü.

Osangbenertem den jembidang Bijapur Superintendent of Police (SP), Jitendra Kumar Yadav-i, "Tanü Bijapur district nung telungpur 17-i pei sasa police matsügdangi aruogo. Parnok ajakji Gangaloor area committee balala nung züngsemtem liasü," ta metetdakja liasü.

Taoba ita nunga sepaitemi Bijapur district kübok tesem balala nung Maoists telungpur 18 pua liasü aser parnok ket nungi tapoktsü oset aika apu.

Maoists aika khasetba osang angashia Union Home Minister, Amit Shah-i sepaitem nem tenüngsang agütsüogo.

Mongolbarnü ang Chhattisgarh Chief Minister, Vishnu Deo Sai-i New Delhi nung Amit Shah par kidang ajurua state sorkari Maoists samatsütsü atema inyakba lemsatepa liasü.

Sai-isa Bastar region nung terenlok mapa kera inyaktsü, tourism ajungkettsütsü aser rongsenkettsüng jenjang tajungba akümtsü atema Shah den lemsatep.

Sai-i Shah dang, state nung Maoists samatsütsü atema tatembanglen kati arudar, aser iba ya state sorkar aser Centre sorkar na longjemer inyakba ajanga lir, ta ashi.

Sai-isa, Bastar region nung lanurtem skill development, pei sasa mapa inyaktsütsü aser mapa maongka agütsütsü atema sorkari inyaker, ta metetdakja liasü.

BENDANGLI OSANG : Tapak 7 nungi...

US-i Ukraine indang power...

Oval Office nung ajurutebpa sülen lenir ana tsüngta Bodhbarnü mezüng jembia liasü, ajisüaka iba senden sülen linük ana nungi lenirtem Saudi Arabia nung ajuruteba anogo 30 ceasefire asoshi jembia liasü.

Iba ceasefire ya Ukraine aser US-i mulunga agizükaka Putin-i Mongulbarnü US tir den phone ajanga jembidang rara anentsü sentong ya magizük.

Trump den jembidang, energy infrastructure, rail aser port facilities nung amakba densema anentsü asoshi ceasefire shilem kar tenzüksü mulunga lir ta Zelenskyy-i ashi, ajisüaka Moscow-i ceasefire raksara tayang kepzüksü, ta Ukraine tiri tekumdangtsü ashi.

"Ceasefire shilem kar atema asüyonga onoki (Russia den) mezüngzüktep tashi, corresponding document ka mali tashi, ajak anünglen ayimtsü ama nibo bilemer," ta pai drones aser missiles athishia ashi.

Trump-i pa indang social media sapang Truth Social nung, Ukraine aser Russia taginüba aser temepishiba lirumedemtsü nükjidong nung jembia aser ceasefire atema inyakba lenmang shidak nung lir, ta ashi.

Mapang tatsüka lir Secretary of State Marco Rubio-i sangdong tejangjaba

agütsüba nung, Ukraine-i air defence system tali bendenba nung yaritsü Trump-i mulunga agizükogo.

Trump aser Zelenskyy na Ukraine indang electrical supply aser nuclear power plants indang jembia aser Trump-i item plants tem ketdangtsüba nung United States ya teyari tulu alitsü ta Trump-i ashi, ta Rubio sangdong ajangasa ashi.

"Item plants nung America nung kibur akumba ajanga ki o jen tajungtiba nung kumzüka ayutsü aser Ukraine nung energy infrastructure yaritsü," ta Rubio sangdong ajanga ashi.

Power plants onük benok saka Zaporizhzhia facility indang dang jembia ta Zelenskyy-i ashi.

Zelenskyy aser Putin nati energy infrastructure nung amakba anentsü mulungtepogo ta ashir, saka maneni amaker ta kati ka aitsüteper.

Mongulbarnü Trump den phone ajanga jembidang Russia-i Ukraine indang energy infrastructure amakba anentsü Putin-i mulunga liasü.

Ajisüaka Ukraine bhukumer temi mitkar tsütsü teyari agütsüba anenba sülen ang ceasefire rangben atema inyaktsü ta pai ashi, koba Kyiv indang European allies temi magizüki lir.

BILEMDANGANG

"Akoktsü ta bilemertemi tetsükdaksü ajak nung maongka angur."